



Date	: 22 November 2018
Title	: SSM peruntuk RM10 juta bantu usahawan muda mula perniagaan
Publication	: Berita Harian
Page	: 9

SSM peruntuk RM10 juta bantu usahawan muda mula perniagaan

Rompin: Suruhanjaya Syarikat Malaysia (SSM) memperuntukkan RM10 juta dalam bentuk geran bantuan di bawah program BizGrant bagi membantu usahawan muda memulakan perniagaan sepanjang tahun ini.

Pengarah Bahagian Strategi dan Komunikasi Korporatnya, Mohamad Shahren Mohamad Yusri, berkata Bizgrant yang diperkenalkan di lima negeri iaitu Sarawak, Sabah, Melaka, Perak dan Pahang, membolehkan pihaknya memilih usahawan untuk diberi bantuan peralatan perniagaan RM3,000 bagi memulakan perniagaan berdasarkan minat masing-masing.

Katanya, setakat ini RM3.7 juta dalam bentuk bantuan peralatan perniagaan sudah diagihkan kepada 1,229 peserta program BizGrant di lima negeri berkenaan dan baki RM6.3 juta lagi akan diagihkan secara berperingkat kepada usahawan muda yang ter-

pilih di lapan negeri sempena pameran perniagaan SSM (SSM Bizfair) yang akan diadakan di seluruh negara sehingga tahun hadapan.

"Kita akan menjelajah ke Johor, Negeri Sembilan, Selangor, Wilayah Persekutuan, Kedah, Perlis, Terengganu dan Kelantan pada 1 Disember bermula dengan Kedah.

Galak generasi muda

"Usahawan yang berminat membuat permohonan BizGrant akan dipanggil untuk ditemuduga bagi menentukan kelayakan masing-masing sebelum dipilih menerima bantuan berkenaan.

"Program ini sebenarnya dapat membantu menggalakkan generasi muda untuk menyertai perniagaan bagi sektor perusahaan kecil dan sederhana (PKS) menerusi program yang SSM sediakan. Kita juga mendapati ramai pelajar institusi pengajian tinggi turut me-



Mohamad Shahren (tengah) bersama Timbalan Naib Canselor UNITEN KSHAS, Prof Dr Salina Daud (tiga dari kanan) beramah mesra dengan usahawan Desapreneurs pada Majlis Penutup Program Desapreneurs@UNITEN di Bandar Muadzam Shah, semalam.

nunjukkan minat menyertai program berkenaan," katanya.

Beliau berkata demikian selepas menutup program Desapreneurs@UNITEN dan penyerahan BizGrant di Kampus Sultan Haji Ahmad Shah (KSHAS), Universiti Tenaga Nasional (UNITEN), Bandar Muadzam Shah, di sini.

Mohamad Shahren berkata, program BizGrant yang menyasarkan usahawan baharu memulakan perniagaan juga menyediakan bimbingan kepada mereka yang terpilih bagi membantu memasarkan produk mereka ke pasaran lebih luas pada masa depan.

"Desapreneurs@UNITEN diha-

ri lebih 200 usahawan tempatan dari sekitar bandar Muadzam Shah, FELDA Keratong, Bandar Tun Razak dan Kampung Tradisional Kota Bahagia, dekat sini.

"Mereka ini usahawan PKS dan baharu memulakan perniagaan dan memerlukan bantuan khidmat nasihat terutama untuk memasarkan produk masing-masing.

"Program ini bertujuan memberi pendedahan kepada usahawan tempatan mengenai penguasaan perniagaan ketika ini supaya mereka mempunyai ilmu pengetahuan sekali gus mempersiapkan diri mereka untuk menghadapi pelbagai cabaran dalam pasaran

yang lebih besar," katanya.

Sementara itu, pelajar tahun dua Fakulti Perniagaan Antarabangsa UNITEN, Shakir Luqman Sapawi, 21, menerima peti sejuk mini sebagai peserta Bizgrant untuk kemudahan menyimpan pes nasi goreng dan membolehkannya meluaskan perniagaan nasi goreng 'Nagoden' kepada pelajar UNITEN yang gemarkan makanan ringkas.

Peminat fotografi, Muhammad Amin Amizam, 22, pula menerima kamera DSLR untuk membantunya menyediakan perkhidmatan fotografi untuk perkahwinan atau pelbagai majlis keramaian lain bagi menambah pendapatan.